



noth stecket / redet viel anders von vnfall /  
denn der in freuden schwebet. Vnd wer in  
freuden schwebet / redet vnd singet viel an-  
ders von freuden / denn der in furcht steckt.  
Es gehet nicht von hertzen ( spricht man )  
wenn ein trawriger lachen / oder ein fröli-  
cher weinen sol / das ist / seines hertzen grund  
stehet nicht offen / vnd ist nicht heraus.

Was ist aber das meiste im Psalter / denn  
solch ernstlich reden in allerley solchen sturm  
winden ? Wo findet man feiner wort von  
freuden / denn die Lobpsalmen vnd Danck-  
psalmen haben ? Da siehestu allen Heiligen  
ins hertz / wie in schöne lustige Garten / ja  
wie in den himel / wie feine / hertzliche / lu-  
stige blumen darinnen auffgehen / von aller-  
ley schönen frölichen gedancken gegen Gott  
vmb seine wolthat.

Wiederumb / wo findestu tieffer / klegli-  
cher / jemmerlicher wort von trawrigkeit /  
denn die Klagepsalmen haben ? Da siehestu  
abermal allen Heiligen ins hertz / wie in den  
Tod / ja wie in die Helle / Wie finster vnd  
dunckel ist da / von allerley betrübtem an-  
blick des zorns Gottes. Also auch / wo sie

